

## **Ataatsimiinnerup ammarneqarnera**

(Inatsisartut Siulittaasuut)

Coronap siaruaannerata tamatumalu inuiaqatigiinnut sunniutaasa nassatarisai pissutigalugit Inatsisartut immikkut ittumik nalinginnaanngitsumillu ataatsimiinnerannut matumunnga uummammik pisumik tamassi tikilluaqqusinnaagassi assut nuannaarutigaa.

Inatsisartut immikkut ittumik ataatsimiinnerat una ullormik ataatsimik sivisussuseqassasoq naatsorsuutigineqarpoq.

Naalackersuisut Siulittaasuata kissaateqarneratigut immikkut ittumik ataatsimiinnissamut matumunnga aggersaasoqarpoq, Naalackersuisut Siulittaasuata Inatsisartut Suleriaasianni § 38, imm. 3 innersuussutigalugu Coronavirussip siaruaannerata akiorneqarnissaanut atatillugu inatsimmik nutaamik akuersissutiginninnissaq siunertaralugu Inatsisartut aggersarneqarnissaat kissaatigaa.

Soorlutaaq UKA 2020-p aallartiffissaata aalajangerneqarnissaa pingaaruteqartoq.

Nuup matuneqarnera pissutigalugu ilaasortat Nuummiittut aggersarneqartariaqarsimapput aammalu partiit ataasiakkaat sinniisussaat aamma Nuummiittut atorneqartariaqarsimapput kiisalu taasisarneq pillugu isumaqatigiissuteqarneq atorneqartariaqarsimalluni. Jess Svanep sulinnigiffeqarallarnini Inatsisartut immikkut ittumik ataatsimiinneranni matumani atorunnaarsikkallarsimavaa.

Sinniisussat uku aggersarneqarput:

Jane Petersen Lanz, Inuit Ataqaqatigiit

Malene Broberg, Partii Naleraq

Paninnguak Kruse, Atassut

Malene Brobergip aamma Paninnguak Krusep qinigaasinnaanerat Inatsisartunit siusinnerusukkut akuersissutigineqareerpoq.

Pinerluuteqarsimasunut nalunaarsuiffimmit paasissutissat tunngavigalugit Qinigaanerup Misilinneqarnissaanut Ataatsimiititaliap Suleriaatsimi § 2 naapertorlugu Jane Petersen Lanzip qinigaasinnaanera misilippaa.

Tamanna Jane Petersen Lanzip qinigaasinnaanerata qularutigineqarnissaanut tunngavissiinnigilaq. Taamaattumillu Jane Petersen Lanzip qinigaasinnaanera akuerineqartutut isigineqassasoq ataatsimiititaliap inassutigaa.

Akerliusoqarpa? Taamaattoqanngilaq. Taamaalillutillu Inatsisartut Jane Petersen Lanzip qinigaasinnaasutut akueraat sinniisullu pingasuusut Inatsisartut immikkut ittumik ataatsimiinnerannut matumunnga tikilluaqquneqarput.

Ilaasortat uku sinniisussanik aggersaalluni najuutinngikkallarput:

Siverth K. Heilmann, Atassut  
Jens Napatok', Partii Naleraq  
Mikivusuk Thomassen, Inuit Ataqtigiit

Ilaasortat uku najuussinnaannginneq pissutigalugu sinniisussanik aggersaanani najuutinngikkallarput:

Nivi Olsen, Demokraatit  
Simigaq Heilmann, Demokraatit

Ilaasortat uku taasisarneq pillugu isumaqtigiissuteqarput:

Hermann Berthelsen, Siumut aamma Peter Olsen, Inuit Ataqtigiit  
Erik Jensen, Siumut aamma Mimi Karlsen, Inuit Ataqtigiit  
Anders Olsen, Siumut aamma Stine Egede, Inuit Ataqtigiit  
Henrik Fleischer, Siumut aamma Aqqa Samuelsen, Inuit Ataqtigiit  
Jens Danielsen, Siumut aamma Hans Enoksen, Partii Naleraq  
Justus Hansen, Demokraatit aamma Aqqalu Jermiassen, Atassut

Taamaalillunilu partiit eqaatsumik suleqataanerisigut Inatsisartut aalajangiisinnaassuseqarnerat anguneqarpoq.

Taamaalillungalu Inatsisartut immikkut ittumik ataatsimiinnera manna ammarneqartutut nalunaarutigaa.

Maannalu immikkoortoq 2-mut ingerlaqqissaagut, taannalu tassaavoq oqaluuserisassanut nassuiaat.